



Broj: 12-08-5-1934-1/2021
Sarajevo, 10.05.2021. godine

n/r Svi predsjednici općinskih/osnovnih sudova
n/r Svi predsjednici kantonalnih/okružnih sudova
n/r Svi predsjednici okružnih privrednih sudova
n/r predsjednik Višeg privrednog suda u Banjoj Luci
n/r predsjednik Osnovnog suda Brčko Distrikta BiH
n/r predsjednik Apelacionog suda Brčko Distrikta BiH

Predmet: Provođenje „Sedmica sudske nagodbe“ u sudovima u BiH

Poštovani,

Aktivnost „Sedmice sudske nagodbe“ se, u organizaciji VSTV-a BiH, kontinuirano provodi u svim sudovima u BiH od 2016. godine. U prethodnim godinama, aktivnost se provodila u okviru projekata koje je implementirao VSTV BiH sredstvima Vlade Norveške i Vlade Švedske, dok nastavak aktivnosti „Sedmice sudske nagodbe“ predstavlja realizaciju strateškog opredjeljenja VSTV-a BiH za rješavanje sporova mirnim putem.

S tim u vezi, obavještavamo vas da će se, osme po redu, „Sedmice sudske nagodbe“ realizovati u periodu od 07. do 18. juna 2021. godine.

Kao i do sada, sudovi imaju obavezu da u navedenom periodu zakažu ročišta u što većem broju predmeta u kojima postoji mogućnost sklapanja sudske nagodbe, te da se stranke podstaknu na rješavanje predmeta na ovaj način.

Analizom rada svih sudova u prethodnom periodu, uočeno je da određeni sudovi ulažu dodatne napore i ostvaruju nadprosječne rezultate, dok kod drugih sudova izostaje adekvatan angažman. Stoga će se, prilikom analize rezultata aktivnosti „Sedmica sudske nagodbe“, posebna pažnja posvetiti sudovima koji u prethodnom periodu nisu ostvarivali zadovoljavajuće rezultate.

U skladu sa navedenim, pozivamo predsjednike sudova da aktivno pristupe pripremi i organizaciji aktivnosti, te da izrade i provedu plan aktivnosti koje će preduzeti na području mjesne nadležnosti suda. Dakle, potrebno je da predsjednici sudova poduzmu pripreme radnje za realizaciju aktivnosti i obavijeste sudije i stručne saradnike da identifikuju predmete po kojima će postupati tokom „Sedmicâ sudske nagodbe“. Nakon identifikacije predmeta, potrebno je, uz poziv za pripremno ročište/glavnu raspravu ili strankama u žalbenom postupku, dostaviti i poziv da svoj spor riješe sudskom nagodbom.

Predsjednici sudova su, do 31. maja 2021. godine, VSTV-u BiH obavezni dostaviti liste izdvojenih predmeta po kojima će postupati, s ciljem sklapanja nagodbe u toku trajanja aktivnosti.

Kad su u pitanju sudovi koji po stvarnoj nadležnosti postupaju u privrednim sporovima, predsjednici istih se pozivaju da sa posebnom pažnjom pristupe realizaciji ove aktivnosti, s obzirom na činjenicu da značajan broj ovih predmeta ima visoku vrijednost spora, te kao takvi značajno utiču na ekonomske tokove u državi. Dužina trajanja privrednih predmeta se negativno reflektuje na poslovanje privrednih subjekata, te bi rješavanje sporova u što kraćem vremenskom roku korištenjem sudske nagodbe, kao alata za rješavanje sporova mirnim putem, doprinijelo stvaranju bolje poslovne klime.

U prilogu ovog dopisa ponovo dostavljamo unificirani obrazac – „Obavijest za stranke“, čiji sadržaj je usvojila Stalna komisija na sastanku održanom 09. juna 2016. godine, a koji je potrebno dostaviti strankama u predmetima koji se vode pred sudom, odnosno sa istim upoznati širu javnost, u formi koju smatrate prikladnom (putem web portala, oglasnih ploča u sudu i dr.). **Takođe, sudovima će biti dostavljene i Smjernice za zaključenje sudske nagodbe namijenjene strankama u sudskim postupcima, koje je VSTV BiH, u okviru projekta „Izgradnja efikasnog pravosuđa u službi građana – IPA 2017“, štampao u formi promotivne afiše, kako bi se iste mogle dostaviti strankama uz poziv za pripremno ročište/glavnu raspravu, te kako bi se mogle istaći na vidnom mjestu u sudu.**

Takođe, podsjećamo da je, u okviru projekata koje je implementirao VSTV BiH u saradnji s Centrima za edukaciju sudija i tužilaca u FBiH i RS (u nastavku: Centri), osigurana kontinuirana obuka sudija na temu sudske nagodbe, koja je postala sastavni dio godišnjih programa rada Centara. Stoga, još jednom koristimo priliku da Vas podsjetimo na važnost specijalizirane obuke s ciljem unapređenja znanja i vještina sudija kada je u pitanju mirno rješavanje sporova.

Kao i do sada, VSTV BiH će s posebnom pažnjom pratiti pripremne aktivnosti, te izraditi detaljan izvještaj o ostvarenim rezultatima svakog suda.

S očekivanjem da će aktivnost „Sedmice sudske nagodbe“ ove godine zabilježiti bolje rezultate, srdačno Vas pozdravljam.

S poštovanjem,

Prilog: - Obavijest za stranke

Dostavljeno:

- Naslovu;
- a/a



OBAVIJEST ZA STRANKE
„Sedmice sudske nagodbe“

Poštovani,

Ovim putem želimo da Vas informišemo o provođenju aktivnosti „Sedmice sudske nagodbe“ u našem Sudu.

Na inicijativu Visokog sudskog i tužilačkog vijeća BiH u svim prvostepenim i drugostepenim sudovima u BiH organizuje se aktivnost „Sedmice sudske nagodbe“.

Period implementacije aktivnosti je od 07. do 18. juna 2021. godine

Cilj organizovanja „Sedmica sudske nagodbe“ jeste rješavanje što je moguće većeg broja predmeta mirnim putem, u skraćenom postupku, koji je ekonomičniji i brži za stranke. Na ovaj način se želi izvršiti pozitivan utjecaj na efikasnost sudskih postupaka te promjenu pristupa suda i stranaka rješavanju sporova, gdje se kao prioritet postavlja brzo i efikasno rješavanje, s akcentom na zadovoljstvo stranaka na ishod spora i uslugu suda.

U skladu sa navedenim, pozivamo sve zainteresovane stranke, a čiji se predmeti vode pred ovim Sudom, da u navedenom periodu pristupe sudu te riješe svoj predmet sudskom nagodbom.

Ukoliko želite Vaš predmet riješiti sudskom nagodbom, to možete učiniti na način da informišete sudiju koji vodi Vaš predmet, na jedan od sljedećih načina:

- samostalno ili preko svog zastupnika uputite pismeni prijedlog za zaključenje sudske nagodbe;
- samostalno ili preko zastupnika kontaktirajte sudiju kako bi zajednički dogovorili termin za ročište za sklapanje sudske nagodbe;
- zajedno sa suprotnom strankom, te zastupnikom ukoliko ga imate, u toku navedenog perioda, pristupite na sud sa prijedlogom za zaključenje sudske nagodbe.

Prednosti sudske nagodbe

Sudska nagodba predstavlja:

Kraći i efikasniji postupak

Vaš spor se okončava zaključivanjem sudske nagodbe pred prvostepenim sudom. Sporazum stranaka se unosi u zapisnik koji stranke potpisuju. Sudska nagodba ima status izvršne isprave, bez drugostepenog žalbenog postupka u predmetu.

Jeftiniji postupak

Sudska nagodba je privilegovana sa aspekta plaćanja sudske takse, a prema odredbama Zakona o sudskim taksama. Zaključivanje sporazuma među strankama znatno skraćuje vrijeme trajanja spora, te na taj način reducira i ostale potencijalne troškove nastale u vezi sa sudskim postupkom.

Jednostavniji postupak

U slučaju da se spor riješi zaključenjem sudske nagodbe stranke i sud su pošteđeni dugotrajnog vođenja postupka, nepotrebnog pribavljanja i izvođenja dokaza, odlaganja/odgađanja ročišta, dugotrajnog postupka namirenja, eventualnog drugostepenog postupka te dodatnih troškova koji nastaju pri tome.

Sigurnost i povjerenje

Sudska nagodba je izvršna isprava – stranke su u obavezi postupiti prema dogovoru navedenom u zapisniku o sudskoj nagodbi, jednako kao po pravosnažnoj i izvršnoj presudi. U slučaju da dužnik ipak ne postupi po postignutoj nagodbi, na osnovu nje je moguće pokrenuti postupak za prinudnu naplatu (izvršni postupak). Time se stranke oslobađaju dodatnog vođenja parničnog postupka pred sudom.

Prednost rješenja spora između stranaka zaključenjem sudske nagodbe je i očuvanje poslovne saradnje ili privatnih odnosa između stranka u postupku. Prilikom zaključenja sudske nagodbe stranke same biraju način rješenja spora i nagodba predstavlja njihov međusobni dogovor. U tom slučaju istinski sami odlučujete o sudbini Vašeg spora.

S poštovanjem,